

The background features a complex, repeating geometric pattern in shades of brown and gold. A prominent vertical strip runs down the center, containing a more intricate, interlocking star and polygonal design. On either side of this strip are large, stylized floral or geometric motifs that resemble stylized flowers or shells, rendered in a similar color palette. The overall aesthetic is that of traditional Islamic art.

Veliki grijesi
među supružnicima

Abdullah b. Sulejman el-Hubejši

Veliki grijesi među supružnicima

Abdullah b. Sulejman el-Hubejši

Medina, 1429/2008

naslov originala:
El-Kebairu bejnez-zevdžejni

naslov prijevoda:

VELIKI GRIJESI
MEĐU SUPRUŽNICIMA

autor:

Abdullah b. Sulejman el-Hubejši

prijevod:

Enes Čaušević

lektura:

Abdurrahman Kuduzović

šerijatska recenzija:

Nermin Klopić

prelom teksta:

Enes Čaušević

Medina, 1429/2008

...:Uvod:...

Zahvala pripada Allahu, dželle šanuhu, Njega hvalimo, od Njega pomoć i oprost tražimo. Njemu se kajemo i od Njega utočište od zla naših duša i loših djela tražimo. Koga Allah, dželle šanuhu, uputi, niko ga ne može u zabludu odvesti, a koga u zabludi ostavi, niko ga ne može na Pravi put izvesti. Svjedočim da nema istinskog boga osim Allaha. Svjedočim da je Muhammed, sallallahu alejhi ve sellem Njegov rob i Njegov poslanik.

Porodica u Islamu igra vrlo važnu ulogu. Šerijat, islamski vjerezakon štiti porodicu, njenu harmoniju i opstanak, pojašnjava temelje na kojima počiva, prava i obaveze supružnika, i sve to kako bi brak bio veza i oličenje milosti i ljubavi. Usljed toga, porodica egzistira u sigurnom okruženju i živi lijepim životom kroz koji uči ono što je dobro i stiče lijepe manire. Najbolji pokazatelj za to jeste primjer Poslanika, sallallahu alejhi ve sellem, u lijepom ophođenju prema suprugama: stalno ih je obveseljavao, zabavljao, nježno se odnosio prema njima, davao im, pomagao ih u kućnim poslovima, bio milostiv prema njima, previđao ono što nije volio kod njih, hvalio ih, ispoljavao im svoju ljubav i uljepšavao im se, neka je Božiji mir i spas na njega do Sudnjega dana. Obaveza bračnih drugova je uzajamno poštovanje, velikodušno izvršavanje obaveza i ažurnost u tome. Uzvišeni kaže:

„S njima lijepo živite!” (En-Nisa, 19.)

Tumačeći ajet, Hafiz Ibn-Kesir kaže: „Lijepo s njima govorite i postupajte prema svojim mogućnostima i činite im ono što biste željeli da se vama čini, jer, Allah, dželle šanuhu, kaže: **‘One imaju isto toliko prava koliko i dužnosti, prema zakonu.’**” (El-Bekara, 228)

Supruga je obavezna da svome mužu pruži sve što od nje traži (naravno, ako je traženo u saglasnosti sa Šerijatom). Ako svaki bračni drug ispuni svoje obaveze, brak će biti sretan i dugotrajan. U protivnom, eto – nesreće i svađe, i život svakog od njih će biti srušen. Mnogi šerijatski tekstovi traže da se čini dobročinstvo prema ženi, ali i poručuju: idealan je život nemoguć. Poslanik, sallallahu alejhi ve sellem, rekao je: „*Tražite da se lijepo odnosi prema ženama, jer, žena je stvorena od rebra, a rebro je najkrivlje na vrhu: ako ga pokušaš ispraviti, slomit će se, a ako ga ostaviš, ostat će krivo, zato, naređujte dobročinstvo prema ženama.*“

U drugom predanju stoji: „Žena je stvorena od rebra, i niko je neće moći ispraviti; ako se njome naslađuješ, naslađuj se pored njenih nedostataka, a ako je pokušaš ispraviti, slomit ćeš je, a lomljenje je razvod braka.“ Poslanik, sallallahu alejhi ve sellem, rekao je: „Neka vjernik ne mrzi vjernicu, ako mu se kod nje nešto ne sviđa, naći će drugo što mu se sviđa.“ Mnogi supružnici očekuju od svojih bračnih drugova da budu savršeni, što je nemoguće. To je razlog njihovog neuspjeha, nezadovoljstva, a možda dovede i do raskida bračnog ugovora: „...ako je pokušaš ispraviti, slomit ćeš je, a lomljenje je razvod braka.“ Zato muž treba da toleriše sve što žena čini, izuzev stvari koje skrnave vjeru i čast. Ovako nas uči Vjerovijesnik, sallallahu alejhi ve sellem, prema hadisu od Semure, radijallahu anhu: „Žena je stvorena od rebra, ako je pokušaš ispraviti slomit ćeš je, zato je ostavi onakvu kakva jest.“

Vjernica treba da zna da je Poslanik, sallallahu alejhi ve sellem, zadovoljstvo muža ženom učinio razlogom njenog ulaska u Džennet. Et-Tirmizi je zabilježio predanje od Umm-Seleme, radijallahu anha, gdje je Allahov Poslanik, sallallahu alejhi ve sellem, rekao: „Koja god žena umre a njen muž njome zadovoljan, ući će u Džennet.“ A muž treba da zna da je Poslanik, sallallahu alejhi ve sellem, dobročinstvo i lijep odnos prema porodici učinio uzrokom dobra i potpunosti vjerovanja. Et-Tirmizi također je zabilježio da je Ebu-Hurejra, radijallahu anhu, prenio sljedeće Resulullahove, sallallahu alejhi ve sellem, riječi: „Najpotpunijeg vjerovanja jesu oni ljudi koji se najljepše ponašaju, a najbolji od njih jesu oni koji su najbolji prema svojim ženama.“

Od brige islamskog vjerzakona o bračnom životu jesu i tekstovi koji su na tu temu došli u Kur'anu i sunnetu, poput opomena i prijetnji vezanih za određene prestupe i greške koje se dešavaju među bračnim drugovima, kao i pojašnjenje da neke od tih grešaka spadaju u velike grijehove. A grijesi se dijele na velike i male. Dokaz za to su Kur'an, sunnet i konsenzus islamskih učenjaka. Uzvišeni kaže: „**Ako se budete klonili velikih grijehova, onih koji su vam zabranjeni, Mi ćemo preći preko manjih ispada vaših i uvest ćemo vas u divno mjesto.**“ (En-Nisa, 31.) Također: „...**one koji se klone velikih grijehova a naročito razvrata, a one bezazlene On će oprostiti, jer Gospodar tvoj, zaista, mnogo prašta.**“ (En-Nedžm, 32.) Muslim u svome *Sahihu* zabilježio je sljedeći hadis: „**Pet namaza, džuma do džume, ramazan do ramazana brišu grijeh između njih, ako se ne čine veliki grijesi.**“

Er-Ragib, rahimehullah, u djelu *Mufredat* zapisao je: „Veliki grijeh je svaki grijeh za koji slijedi bolna kazna.“

Ovdje ćemo tretirati neke najučestalije velike grijehove u braku. Želim na njih skrenuti pažnju i upozoriti radeći po Resulullahovim, sallallahu alejhi ve sellem, riječima: „**Vjera je savjet.**“

1. Allah, dželle šanuhu, neće oprostiti takva čina

Er-Ragib u djelu *Mufredat* zabilježio je mehadis Resulullahove, sallallahu alejhi ve sellem, koji govore o grijesima koji su najteži u očima Allahovim, dželle šanuhu. Oni su: „Allah neće oprostiti takva čina: čovjek koji se odrekne svoje roditelji, čovjek koji se odrekne svoje žene, čovjek koji se odrekne svoje krvi.“

2. Povećanje dobročinstva ženom je od najvećih namaza i vrata

U *Sahihu* Muslimovom zabilježio je mehadis Resulullahove, sallallahu alejhi ve sellem, koji govore o grijesima koji su najteži u očima Allahovim, dželle šanuhu. Oni su: „Allah neće oprostiti takva čina: čovjek koji se odrekne svoje roditelji, čovjek koji se odrekne svoje žene, čovjek koji se odrekne svoje krvi.“

1. Poricanje muževog dobročinstva

Veza među supružnicima nije materijalne prirode, niti je veza vođena životinjskim nagonom, već je to duhovna, plemenita veza. Ukoliko je veza zasnovana na dobru i iskrenosti, nastavlja se i na onome svijetu, nakon smrti. Kur'an kaže: „...**edenski vrtovi u koje će ući oni i roditelji njihovi i žene njihove i porod njihov – oni koji su bili čestiti – i meleki će im ulaziti na svaka vrata...**“ (Er-Rad, 23.) Također: „**Onima koji su vjerovali i za kojima su se djeca njihova u vjerovanju povela priključit ćemo djecu njihovu, a djela njihova nećemo nimalo umanjiti: svaki čovjek je odgovoran za ono što sam čini.**“ (Et-Tur, 21.) Tu vezu štiti i održava lijep odnos. To je nemoguće ostvariti, osim da svaka strana spozna svoja prava i obaveze. Dio toga je priznavanje supruge svome mužu njegovih prava i dobročinstva. Ako ne učini tako i porekne i zanemari mužovo dobročinstvo prema njoj, počinila je veliki grijeh. Za taj veliki prijestup postoje brojne prijetnje:

1- Allah, dželle šanuhu, neće pogledati takvu ženu

En-Nesai u djelu *Es-Sunenul-kubra* zabilježio je predanje Abdullaha b. Amra, radijallahu anhu, u kojemu je Vjerovijesnik, sallallahu alejhi ve sellem, upozorio: „**Allah, dželle šanuhu, neće pogledati ženu koja je nezahvalna svome mužu, a o njemu ovisi.**“ El-Albani je hadis ocjenio autentičnim.

2- Poricanje dobročinstva jedan je od razloga ulaska u Vatru

El-Buhari i Muslim zabilježili su kako je Ibn-Abbas, radijallahu anhu, pripovijedao da je Allahov poslanik, sallallahu alejhi ve sellem, tokom obraćanja prilikom pomračenja Sunca, rekao: „**Vidio sam Vatru, prizor kakav nikada nisam vidio, a većina njenih stanovnika bile su žene.**“ Prisutni upitaše: „Zašto, Allahov poslaniče?“ Odgovori: „**Zbog poricanja.**“ Ponovo upitaše: „Zbog poricanja Allaha?“ „**Nezahvalne su prema mužu, poriču dobročinstvo; kada bi joj cijelog života činio dobro i tada napravio kakav propust, rekla bi: nikada od tebe nisam dobro doživjela.**“

Imam Ibn-Muflih, rahimehullah, kaže: „Poslanik, sallallahu alejhi ve sellem, zaprijetio je Vatrom za nezahvalnost prema mužu i poricanje dobročinstva, što ukazuje da je to jedan od velikih grijeha, što je i stav imama Ahmeda, rahimehullah.“

3- Poricanje dobročinstva vid je praktičnog nevjerstva (kufrun ameli)

El-Buhari u djelu *Edebul-mufred* zabilježio je kako je ensarijka Esmā b. Jezid pripovijedala da je Poslanik, sallallahu alejhi ve sellem, prošao je pored nje dok je bila u društvu sa vršnjakinjama i rekao: „*Ne poričite dobročinitelje.*“ Upitala je, Allahov poslaniče, ko su dobročinitelji? Odgovorio je: „*Možda će neka od vas ostati duže sa svojim roditeljima, a zatim će joj Allah dati muža s kojim će roditi dijete, naljutit će se i sve poreći govoreći: od tebe nikad dobro nisam doživjela.*“ Lancem prenosilaca ovoga predanja po šejhu El-Albaniju hadis je autentičan.

2. Odbijanje muža u postelji

Mnogi su hadisi koji slove da je ženi veliki grijeh da odbije muža u postelji, kada je pozove. Neki od tih hadisa jesu sljedeći i povlače za sobom sljedeće posljedice.

1- Proklinju je meleki

El-Buhari i Muslim zabilježili su preko Ebu-Hurejre, radijallahu anhu, da je Vjerovjesnik, sallallahu alejhi ve sellem, rekao: „*Kada čovjek pozove svoju suprugu u postelju a ona odbije da se odazove, meleki je proklinju sve dok ne osvane.*“ Imam En-Nevevi, rahimehullah, komentirajući hadis, zapisao je: „*Hadis strogo zabranjuje da se žena ne odazove mužu u postelju, naravno, ako ne postoji šerijatski opravdan razlog. Čak ni mjesečni ciklus nije validan razlog za neodaziv, tim prije jer muž polaže pravo da se naslađuje njenim tijelom iznad pupka.*

Meleki je proklinju dok god je u tome grijehu, sve dok čovjek ima potrebu za njom ili pokajanjem i odazivom.“

2- Allah, dželle šanuhu, se rasrdi na nju

Muslim je zabilježio kako je Ebu-Hurejra, radijallahu anhu, prenio sljedeći hadis: „*Tako mi Onoga u Čijoj je ruci moja duša, ni jedan čovjek ne pozove svoju suprugu u postelju, pa ga ona odbije, a da Onaj na nebesima ne bude srdit na nju, sve dok se muž ne odljuti.*“ Er-Ragib kaže: „*Ovdje srdžba predstavlja veliki gnjev koji za sobom povlači kaznu.*“ Šejh Muhamed b. el-Usejmin, rahimehullah, kaže: „*Ovaj hadis nosi strašnju poruku od onoga gdje stoji da je meleki proklinju, jer, gore je kada se Allah, dželle šanuhu, rasrdi na čovjeka nego kada ga prokune, Allah nas sačuvao!*“

3- Allah ne prima njena dobra djela

El-Hakim i Et-Taberani zabilježili su da je Abdullah b. Omer, radijallahu anhumā, prenio sljedeće Resulullahove, sallallahu alejhi ve sellem, riječi: „*Dvije*

su vrste ljudi čiji namaz neće biti primljen: rob koji je pobjegne od svoga vlasnika dok se ne vrati i žena nepokorna svome mužu dok mu se ne pokori.“ A treba napomenuti da je mužu zabranjeno da bezrazložno ignoriše suprugu i uskrati joj spolni odnos, jer to ima štetne posljedice. Ako to učini bez razloga, griješan je prema Allahu, dželle šanuhu, jer je nanošenje štete u osnovi zabranjeno. Nema sumnje da je ignorisanje supruge u postelji krajnje opasna stvar, posebno danas kada su iskušenja mnogobrojna i kada je olakšano činjenje prijestupa. Dakle, muž treba da se boji Allaha, dželle šanuhu, kada je u pitanju njegova supruga i da je ne izlaže iskušenjima. Ako je ignorisanje supruge odgojnog karaktera, tada ne smeta, jer je Poslanik, sallallahu alejhi ve sellem, svoje supruge ignorisao tako što im nije dolazio po mjesec dana.

4- Time oskrnavljuje Allahova, dželle šanuhu, prava

Et-Taberani je preko Zejda b. Erkama, radijallahu anhu, zabilježio i ovaj hadis: „Žena ne izvršava obaveze prema Allahu, dok ne bude izvršavala sve obaveze prema mužu; ako je pozove, a ona na sedlu, treba mu se odazvati.“

3. Otkrivanje bračnih tajni

Čovjek se osamljuje sa svojom suprugom i o tome ljubomorno šuti i nikoga ne obavještava. Razotkrivanje bračnih tajni u moralnim sredinama je sramotno djelo. Ukoliko bi govorio o tome, osramotio bi sebe i svoju porodicu. Dakle, ne postoji razlika između razotkrivanja pred očima i razotkrivanja pred ušima, jer se na oba načina otkriva stidno mjesto. Širenje detalja oko dešavanja među supružnicima prilikom spolnog odnosa je zabranjeno (haram) djelo. Neki hadisi taj čin tretiraju velikim grijehom.

1- Otkrivanje bračnih tajni djelo je najgorih ljudi kod Allaha na Sudnjeme danu

Muslim je preko Ebu-Seida el-Hudrija, radijallahu anhu, zabilježio da je Vjerovijesnik, sallallahu alejhi ve sellem, rekao: „Od najgorih ljudi na Sudnjeme danu jeste čovjek koji opći sa svojom suprugom pa je opisuje pred drugima.“

2- Ko otkriva bračne tajne liči na šejtana koji pred ljudima spolno opći sa svojom drugom

Imam Ahmed zabilježio je da je Esmā b. Jezid, radijallahu anha, bila kod Poslanika, sallallahu alejhi ve sellem, dok su ljudi i žene sjedili kod njega, pa je rekao: „Možda čovjek govori šta je radio sa svojom ženom, a možda i žena govori šta je radila sa svojim mužem.“ Narod se ušutio, pa Esmā reče: „Allaha mi, tako je, Allahov Poslanice! Tako čine i jedni i drugi.“ Reče: „Ne činite to, to je isto kao kada šejtan sretne svoju drugu i objubi je a ljudi gledaju.“

Imam Eš-Ševkani, rahimehullah, zapaža: „Prethodna dva hadisa slove da je zabranjeno otkrivanje bračnih tajni. Ovo iz razloga što je onaj ko to čini od najgorih ljudi, i samim tim što liči na šejtana koji sretne svoju drugu i objubi je na očigled ljudi, što predstavlja najjači dokaz zabrane otkrivanja bračnih tajni, jer činjenjem pokuđenog djela čovjek ne postaje loš, a pogotovo ne – najgori. Na osnovu toga, spolni odnos na očigled ljudi je bez ikakve sumnje zabranjen (haram). Poslanik, sallallahu alejhi ve sellem, u Ebu-Seidovom predanju

posebno je naglasio muškarca, te je i kaznu spomenuo u tome smislu ne spomenuvši ženu, jer to u većini slučajeva čine muškarci.“

4. Spolno općenje tokom mjesečnog ciklusa

Allah, dželle šanuhu, zabranio je spolno općenje u mjesečnom ciklusu: „I pitaju te o mjesečnom pranju. Reci: 'To je neprijatnost.' Zato ne općite sa ženama za vrijeme mjesečnog pranja, i ne prilazite im dok se ne okupaju.“ (El-Bekara, 222.) Budući da se radi o neprijatnosti, Allahova, dželle šanuhu, mudrost iziskuje da zabrani Svojim robovima neprijatnost. Termin *fil-mehid*, spomenut u ajetu znači mjesto odakle otiče krv prilikom mjesečnog pranja, odnosno, ženski spolni organ. Pod neprilaženjem misli se na neupražnjavanje spolnog odnosa, ne misli se na – sjedenje ili dodirivanje. Jer, za razliku od spolnog odnosa, to je dopušteno, čak i naslađivanje ženinim tijelom, osim spolnog organa, je dopušteno. Spolno općenje sa ženom dok je u mjesečnom ciklusu je zabranjeno po konsenzusu islamskih učenjaka i spada u velike grijeha. To se zaključuje na osnovu prijetnje u hadisima za onoga ko obljubi ženu dok je u mjesečnom ciklusu. Ahmed i četverica autora *Sunena* sa autentičnim lancem prenosilaca zabilježili su da je Ebu-Hurejra, radijallahu anhu, prenio sljedeću Resulullahovu prijetnju : „*Ko priđe ženi dok je u mjesečnom pranju ili u njen analni otvor ili ode gataru i povjeruje mu, već je porekao ono što je Allah objavio Muhammedu.*“

Pitanje: *Da li za spolni odnos u mjesečnom ciklusu postoji iskupljenje?*

Odgovor: Četverica autora *Sunena* zabilježili su da je Ibn-Abbas, radijallahu anhuma, onome ko priđe svojoj ženi u mjesečnom ciklusu naređivao da udjeli dinar, ili pola dinara. Neki savremeni učenjaci procijenili su to na 4,25 grama zlata, tako da prestupnik nakon što se pokaje i zatraži oprost, treba udijeliti siromasima u vrijednosti od jednog, ili pola dinara, po svome izboru.

5. Spolni odnos sa ženom u analni otvor

Allah, dželle šanuhu, kaže: „**Žene vaše su njive vaše, i vi njivama vašim prilazite kako hoćete...**“ (El-Bekare, 223.) Ibn-Abbas kaže: Njiva *el-hars* je mjesto ploda djeteta, roditeljka. Riječi „**...i vi njivama vašim prilazite kako hoćete..**“, znače, kako hoćete, sprijeda, odzada, ali u jedno mjesto, kao što potvrđuju hadisi. Ibnul-Kajjim kaže: „Što se tiče spolnog odnosa u duburu (analni otvor), to nijedan poslanik nije dozvolio, a ono što se pripisuje nekim prethodnicima, tj. da su to smatrali dozvoljenim, je pogrešno.“ Šejh Ibn-Baz, rahimehullah, kaže: „Spolno općenje sa ženom u njenu duburu je veliki grijeh i najružniji vid grijehenja.“

Kažem: Za onoga ko to upražnjava, pritrđena je žestoka prijetnja. Od toga je:

1- Analni odnos sa ženom vid je praktičnog nevjerstva (kufrun ameli)

Bilježi Ahmed i autori «Sunena», sa autentičnim lancem prenosilaca od Ebu-Hurejre, radijallahu anhu, da je rekao: Allahov Poslanik, sallallahu alejhi ve sellem, je rekao: „*Ko priđe ženi dok je u mjesečnom pranju ili u njen analni otvor ili ode gataru i povjeruje mu, već je porekao ono što je Allah objavio Muhammedu.*“

Bilježi Et-Taberani sa lancem prenosilaca kojeg Albani, rahimehullah, smatra autentičnim, da je Vjerovjesnik, sallallahu alejhi ve sellem, rekao: „*Onaj ko ženama prilazi u njihovu duburu, je nevjernik.*“

2- Allah, dželle šanuhu, ga neće pogledati

Bilježe Et-Tirmizi i En-Nesai sa dobrim lancem prenosilaca, od Ibn-Abbasa, radijallahu anhu, da je Allahov Poslanik, sallallahu alejhi ve sellem, rekao: „*Allah, dželle šanuhu, neće pogledati čovjeka koji sa svojom ženom spolno opći u njenu duburu.*“

3- Onaj ko to upražnjava je proklet

Bilježi Ahmed, Ebu-Davud i En-Nesai, sa autentičnim lancem prenosilaca od Ebu-Hurejre, radijallahu anhu, da je rekao: Vjerovjesnik, sallallahu alejhi ve sellem, je rekao: „*Proklet je onaj ko svojoj ženi priđe u*

duburu.“ Bilježi Et-Taberani sa lancem prenosilaca od Ukbe b. Amira, radijallahu anhu, da je Vjerovjesnik, sallallahu alejhi ve sellem, rekao: „Allah, dželle šanuhu, je prokleo one koji svojim ženama prilaze u njihove dubure.“

4- Onaj ko to upražnjava čini pederastiju

Bilježi Ahmed i En-Nesai u «El-Kubra» od Amra b. Šuajba, od njegovog oca, od njegovog djeda, da je Vjerovjesnik, sallallahu alejhi ve sellem, rekao: „To je mala pederastija: misleći na to da čovjek priđe svojoj ženi u duburu.“ Šejh Ibn-Baz, rahimehullah, kaže: „Prilaženje ženi u duburu je vid pederastije, koja je zabranjena muškarcima i ženama, prema riječima Uzvišenog: **'Vi činite takav razvrat kakav prije vas niko na svijetu nije činio...'** (El-Ankebut, 28.).“

Pitanje: Da li postoji iskup za onoga ko svojoj ženi priđe u duburu?

Šejh Ibn-Baz, rahimehullah, kaže: „Prema ispravnijem mišljenju islamskih učenjaka, ne postoji iskup za onoga ko svojoj ženi priđe u duburu. Tim činom, njegova žena ne postaje mu zabranjena, već je ona i dalje njegova, i ona ne treba da mu se u tom velikom grijehu pokorava. Naprotiv, obavezna je da mu to uskrati, i ukoliko se muž ne pokaje, da zatraži raskid braka.“

6. Pripisivanje mužu djeteta koje mu ne pripada

Iskvarenost žene i varanje muža na polju časti uistinu je jedan od najružnijih i najgorih grijeha. Najveća moguća posljedica nastala kao rezultat ženine izopačenosti i prevare jeste miješanje rodoslovlja, tako što žena pripiše svome mužu dijete koje mu ne pripada. Da je ovo djelo jedan od najvećih velikih grijeha i zločina, uopće nije sporno pitanje.

Uvaženi šejh Es-Sefarejni kaže: „Ovo djelo spada u najveće i najružnije velike grijeha. Iz njega proizilazi miješanje rodoslovlja, prilikom čega dolazi do miješanja sa zabranjenim osobama kojima je dijete pripisano i bespravno nasljeđivanja.“ Bilježi Ebu-Davud i Ibn-Hibban u svome «Sahihu», od Ebu-Hurejre, radijallahu anhu, da je čuo Allahovog Poslanika, sallallahu alejhi ve sellem, kako za one povodom kojih je objavljen ajet o *mula'ani* (prizivanju Allahovog prokletstva) kaže: „*Koja god žena pripiše narodu onoga ko im ne pripada, kod Allaha neće imati nikakvog prava i Allah je neće uvesti u džennet.*“ Iako u lancu prenosilaca ovog hadisa postoji slabost, ajet koji govori o *mula'ani* upućuje na žestoku kaznu koja slijedi za ovaj zločin. Uzvišeni – po pitanju žene – kaže: „... a peti put da je stigne Allahova srdžba, ako on govori istinu!“ (En-Nur, 9.)

Učenjaci kažu: Allah, dželle šanuhu, joj prijeti srdžbom, zbog toga što oni na koje se On rasrdi znaju istinu a bježe od nje i zbog veličine grijeha kojeg je počinila.

Ono što treba znati jeste da je prijetnja srdžbom gora od prijetnje prokletstvom, na što ukazuju ajeti o *mula'ani*.

7. Nasilno oduzimanje ženinog vjenčanog dara

Vjenčani dar (mehr) je pravo koje pripada ženi, prema riječima Uzvišenog: „... i draga srca ženama vjenčane darove njihove podajte...“ (En-Nisa, 4.) Znači: Dajte im drage volje, ne odugovlačite i ne zakidajte. Aiša i Ummu-Seleme, radijallahu anhuma, su rekle: Nema ništa gore od ženinog mehra i nadnice radnika. Ataka na ženin mehr se ubraja u velike grijeha. Prijetnje koje su došle za to su slijedeće:

1- Ko to radi čini jasan grijeh

Uzvišeni kaže: „Ako hoćete da jednu ženu pustite, a drugom se oženite, i jednoj od njih ste dali mnogo blaga, ne oduzimajte ništa od toga. Zar da joj to nasilno oduzmete, čineći očigledan grijeh?“ (En-Nisa, 20.) Hafiz Ibn-Kesir, rahimehullah, kaže: „Znači: kada neki od vas hoće da se razvede sa svojom ženom, i na njeno mjesto oženi drugu, neka ništa od onoga što je prvoo dao ne uzima, makar se radilo o tovaru blaga. Ako ipak uradi, i uzme od onoga što je dao prvoo, počinio je očigledan grijeh.“ Es-Sa'di, rahimehullah, kaže: „Ovo je najveći vid nepravde i nasilja.“

2- Poslanik je onoga ko to čini nazvao bludnikom

Bilježi El-Bezzar sa lancem prenosilaca kojeg Albani smatra autentičnim, od Ebu-Hurejre, radijallahu anhu, da je rekao: Allahov Poslanik, sallallahu alejhi ve sellem, je rekao: „Ko oženi ženu uz vjenčani dar, a namjerava da joj ga ne dadne, taj je bludnik.“

3- Srest će Allaha, dželle šanuhu, kao bludnik

Bilježi Et-Taberani od Mejmuna El-Kerdija, od njegovog oca, da je rekao: Čuo sam Allahovog Poslanika, sallallahu alejhi ve sellem, kako kaže: „Koji god čovjek oženi ženu uz vjenčani dar, bio on velik ili mal, pa ne izvrši svoju obavezu, i kao takav umre, srest će Allaha na Sudnjem danu kao bludnik.“

4- Ovo djelo je jedan od najvećih grijeha kod Allaha, dželle šanuhu

Bilježi El-Bejheki u djelu «El-Kubra», sa lancem prenosilaca od Ibn-Omera, radijallahu anhumu, da je Allahov Poslanik, sallallahu alejhi ve sellem, rekao: „Od najvećih grijeha kod Allaha, dželle šanuhu: Čovjek oženi ženu i nakon što zadovolji svoju potrebu prema njoj, pusti je i ode sa njenim vjenčanim darom.“

8. Zahtijevanje razvoda ili iskupa od strane žene, bez šerijatski opravdanog razloga

Neke žene lahko shvaćaju pitanje razvoda, tako da neke traže razvod braka zbog običnih sitnica. Prilikom bilo kakve svađe ili problema ona traži razvod braka. U slučaju bilo kakvog propusta od strane muža, svejedno bio namjieran ili nenamjieran, ona traži razvod braka, misleći da se ovakvo ponašanje uopće ne sučeljava sa Šerijatom. Obaveza žene muslimanke jeste, prije nego zatraži razvod braka, treba da zna da se njeno traženje razvoda braka bez šerijatski opravdanog razloga ubraja u velike grijeha, na što upućuje i praksa Allahovog Poslanika, sallallahu alejhi ve sellem. Od toga je, slijedeće:

1- Takva žena neće osjetiti džennetskog mirisa

Bilježe autori «Sunena» od Sevšana, radijallahu anhu, da je rekao: Allahov Poslanik, sallallahu alejhi ve sellem, je rekao: „*Koja god žena bezrazložno zatraži od svoga muža razvod braka, neće osjetiti džennetskog mirisa.*“ Riječ «bezrazložno» znači: Bez prijeko potrebe pribjegavanja tome. Neki učenjaci kažu: Bit će joj uskraćen džennetski miris makar i ušla u džennet.

2- To je svojstvo licemjera

Bilježi En-Nesai i Ahmed, sa autentičnim lancem prenosilaca, od Ebu-Hurejre, radijallahu anhu, od Vjerovjesnika, sallallahu alejhi ve sellem, da je rekao: „*One koje se iskupe ili traže razvod braka su licemjerke.*“ Ibn-Kesir kaže: „Riječi *el-muhteli'at* i *el-mutenazi'at* znače: One koje traže da se iskupe ili traže razvod braka, bez opravdanog razloga, a licemjerke su zbog toga što kao i ostali licemjeri ne zaslužuju ulazak u Džennet zajedno sa prvima koji u njega uđu. A Allah, dželle šanuhu, najbolje zna.“

9. Nepravednost prema ženama

Poslanik, sallallahu alejhi ve sellem, je praktikovao poligamiju, ali je bio najbolji primjer u pravednosti među ženama, u boravku kod njih, njihovom odijevanju i trošenju na njih. Nepravednost prema ženama je zabranjena stvar, i za onoga ko je nepravedan prema svojim ženama pritrđena je prijetnja. Bilježe autori «Sunena» sa autentičnim lancem prenosilaca, od Ebu-Hurejre, radijallahu anhu, od Allahovog Poslanika, sallallahu alejhi ve sellem, da je rekao: „*Ko bude imao dvije žene, pa bude privrženiji jednoj na štetu druge, doći će na Sudnjem danu a jedna njegova strana bit će nakrivljena.*“ Eš-Ševkani, rahimehullah, kaže: „U ovom hadisu je dokaz o zabrani privilegovanja jednih žena nad drugima, ako se radi o stvarima koje čovjek kontroliše, poput raspodjele, hrane, odijevanja, dok to nije dužan u stvarima koje on ne kontroliše, poput ljubavi i sl.“

Šejh El-Fevzan kaže: Ako čovjek ima više od jedne žene, obavezan je da bude pravedan u raspodjeli vremena koje kod njih provodi, prema riječima Uzvišenog: „**S njima lijepo živite!**“ (En-Nisa, 19), „...**ali ne dopustite sebi takvu naklonost pa da jednu ostavite u neizvjesnosti.**“ (En-Nisa, 129.).

Razlika između potpunog i djelimičnog zapostavljanja, jeste što kod potpune zapostavljenosti zapostavljena biva u neizvjesnosti. Pod raspodjelom vremena podrazumijeva se noćivanje jer se obično tada čovjek nalazi u kući i spava u postelji zajedno sa svojom suprugom. Onaj ko radi noću, poput stražara i sl., treba da među ženama pravilno raspodijeli svoj dan, tako da za njega dan važi kao noć za nekog drugog. Treba da odvoji vrijeme i za one koje su u mjesečnom ili postporođajnom ciklusu, tako što će spavati kod njih, iako neće spolno općiti. Nema pravo da privileguje jedne nad drugima u primjeni raspodjele, osim izvlačenjem (kur'a) ili uz saglasnost ostalih supruža, jer ona s kojom odpočne, na neki način uživa prednost nad ostalima, a pravednost među suprugama je obavezna (vadžib). Nema pravo da putuje sa nekom od njih osim nakon izvlačenja ili saglasnosti ostalih supruža, jer je i Poslanik, sallallahu alejhi ve sellem, sa svojim ženama to činio kada bi kretao na put, i išla je ona čije bi ime bilo izvučeno.

10. Proklinjanje

Bilježi se u «Sunenu» od Vjerovjesnika, sallallahu alejhi ve sellem, da je rekao: „Nije vjernik ko kleveće, proklinje, ko je nemoralan i ko je podrugljiv.“ Riječ *le'an* znači, onaj ko mnogo proklinje ljude na način koji će ih udaljiti od milosti njihovog Gospodara, bilo da ih proklinje direktno, poput riječi Allah prokleo tog i tog, ili indirektno, poput riječi, Allah se rasrdio na njega. Žaloso je što između ostalih i riječi prokletstva kruže među supružnicima, tako da muž proklinje ženu, žena muža, i pored toga što je to vid grijšenja prema Allahu, dželle šanuhu. Upitan je šejh Ibn-Baz, rahimehullah, o ovoj pojavi, pa je odgovorio: „Proklinjanje žene od strane muža je ružna pojava, koja je zabranjena (haram), čak je od velikih grijeha.“

Put koji treba da idu svi muslimani, a pogotovo supružnici, su riječi Uzvišenog: „**Reci robovima Mojim da govore samo lijepe riječi: - jer bi šejtan mogao posijati neprijateljstvo među njima, šejtan je, doista, čovjekov otvoreni neprijatelj.**“ (El-Isra, 53.). Hafiz Ibn-Kesir kaže: „Naređuje Slavljeni i Uzvišeni Svome robu i Poslaniku, sallallahu alejhi ve sellem, da naredi Njegovim robovima - vjernicima da govore samo pozitivan govor i lijepe riječi a u protivnom šejtan bi mogao posijati neprijateljstvo među njima i loš govor pretvoriti u loša djela, što dovodi do zla, prepirke i ubijanja. Uistinu je on neprijatelj Ademu i njegovom potomstvu od kada je odbio učiniti sedždu Ademu, i njegovo neprijateljstvo je jasno i uočljivo.“

Ono što treba da zna svaki supružnik, jeste da je proklinjanje jedan od velikih grijeha, a dokaz za to je prijetnja koja je pritrđena za njega. Od toga je:

1- Proklinjanje vjernika ravno je njegovom ubistvu

U Buharijinom i Muslimovom «Sahihu» se bilježi hadis od Sabita b. Ed-Dahhaka, radijallahu anhu, da je rekao: Vjerovjesnik, sallallahu alejhi ve sellem, je rekao: „*Proklinjanje vjernika jednako je njegovom ubistvu.*“

2- Proklinjanje poništava vjerovanje onoga koji proklinje

Bilježi Et-Tirmizi od Ibn-Mes'uda, radijallahu anhu, od Allahovog Poslanika, sallallahu alejhi ve sellem, da je rekao: „ *Nije vjernik ko kleveće, proklinje, ko je nemoralan i ko je podrugljiv.*“

3- Proklinjanje je jedan od uzroka ulaska u vatru

Bilježi Muslim od Abdullaha b. Omera, radijallahu anhuma, od Vjerovjesnika, sallallahu alejhi ve sellem, da je rekao: „*O skupino žena, udjeljute milostinju, tražite oprost, uistinu sam vidio da je većina stanovnika vatre od vas.*“ Jedna rječita i razborita žena upita: A zašto je, Allahov Poslaniče, većina stanovnika vatre od nas? Poslanik, sallallahu alejhi ve sellem, reče: „*Mnogo proklinjete, i poričete dobročinstvo muža.*“

4- Onaj ko mnogo proklinje neće posredovati, niti će njegovo svjedočenje biti primljeno na Sudnjem danu

Bilježi Muslim od Ebu-Derdaa, radijallahu anhu, da je Vjerovjesnik, sallallahu alejhi ve sellem, rekao: „*Oni koji mnogo proklinju neće posredovati niti svjedočiti na Sudnjem danu.*“

5- Prokletstvo se vraća na onoga ko ga izgovori – da Allah, dželle šanuhu, sačuva

Bilježi Ebu-Davud u djelu «Sunen» od Ebu-Derdaa, radijallahu anhu, da je Vjerovjesnik, sallallahu alejhi ve sellem, rekao: „*Uistinu, kada rob nešto prokune, prokletstvo se uspinje na nebesa, pa mu se zatvore vrata nebeska, zatim se vrati na Zemlju, pa mu se zatvore vrata zemaljska, zatim ide lijevo-desno, pa kad ne nađe izlaza vraća se na onoga kome je upućeno, ako ga zaslužuje, a ako ne, vraća se na onoga koji je proklinjao.*“

Pitanje: *Da li proklinjanje žene znači raskid braka?*

Šejh Ibn-Baz, rahimehullah, kaže: „Proklinjanje žene ne znači raskid braka, već ona ostaje u okrilju svoga muža.“

11. Putovanje u nevjerničke zemlje radi turizma

Putovanje u nevjerničke zemlje po mišljenju islamskih učenjaka zabranjeno (haram) je, osim kada za to postoji šerijatski opravdan razlog, poput putovanja radi liječenja, sticanja korisnog znanja koje je nemoguće steći osim putovanjem u nevjerničke zemlje i sl..

Pojava koja je počela da uzima maha među muslimanima, pogotovo mladencima, je putovanje u nevjerničke zemlje radi turizma i odmora, i pored toga što je Vjerovjesnik, sallallahu alejhi ve sellem, to zabranio.

Od prijatni za putovanje u nevjerničke zemlje koje su došle od Vjerovjesnika, sallallahu alejhi ve sellem, jesu slijedeće:

1- Poslanik, sallallahu alejhi ve sellem, odriče se svakog muslimana koji živi među nevjernicima

Bilježi Et-Tirmizi i Ebu-Davud hadis kojeg Albani smatra autentičnim, od Džerira b. Abdullaha, radijallahu anhu, da je Vjerovjesnik, sallallahu alejhi ve sellem, rekao: „*Odričem se svakog muslimana koji živi među mnogobošcima.*“ Rekoše: A zašto, o Allahov Poslaniče? Reče: „*Zato što žive jedni pored drugih.*“ Hafiz Ibnul-Esir, o značenju hadisa kaže: „Musliman treba, i obavezan je da svoj dom odmakne od doma mnogobošca, i ne treba da obitava u mjestu koje je dostupno pogledu mnogobožaca, već treba da se nastani među muslimanima.“

2- Gubi garanciju

Bilježi El-Bejheki hadis kojeg Albani smatra autentičnim, od Džerira, radijallahu anhu, od Vjerovjesnika, sallallahu alejhi ve sellem, da je rekao: „*Ko živi među nevjernicima, izgubio je garancije.*“

3- Čini djelo koje poništava dobra djela

Bilježi En-Nesai hadis, kojeg Albani smatra dobrim, od Behza b. Hakima, od njegovog oca, a ovaj od svoga oca, da je Vjerovjesnik, sallallahu alejhi ve sellem, rekao: „*Musliman je zabranjen muslimanu. To su dva brata koja se međusobno potpomažu. Allah, dželle šanuhu, od mnogobošca, koji je primio islam, ne prima dobro djelo, dok se ne preseli kod muslimana.*“

Imam Es-Sindi, rahimehullah, kaže: „Znači, hidžra iz nevjerničke u muslimansku zemlju obavezna je za svakog ko primi islam. Ko to ne učini grijehšan je i zaslužuje da mu djelo ne bude primljeno. A Allah, dželle šanuhu, najbolje zna.“

U odgovoru «Stalne komisije za šerijatska pitanja» stoji: Putovanje u nevjerničke zemlje nije dozvoljeno osim uz šerijatski opravdan razlog. Putovanje radi odmora nije šerijatski opravdano, prema riječima Poslanika, sallallahu alejhi ve sellem: „*Odričem se svakog muslimana koji živi među mnogobošcima.*“

Savjetujemo vas da ne putujete u nevjerničke zemlje iz pomenutih razloga, jer u tome leži opasnost od izlaganja smutnji i boravka među mnogobošcima, a Poslanik, sallallahu alejhi ve sellem, u hadisu koji je autentičan, kaže: „*Odričem se svakog muslimana koji živi među mnogobošcima.*“ Postoji još mnogo hadisa koji govore u sličnom kontekstu.

12. Bavljenje sihrom

Sihr je šejtansko djelo. Svako ko želi sreću na ovome i spas na onome svijetu treba da se čuva sihra i onih koji se njime bave, jer vrijednost toga je čovjekova vjera i njegovi ideali. Poslanik, sallallahu alejhi ve sellem, je upozorio svoj ummet, na sihr i one koji se njime bave i pojasnio da je sihr mnogoboštvo i nevjerstvo, te da se odriče svakog sihirbaza i onih koji rasturaju svoju nevjerničku robu. Supružnici treba da se čuvaju od pribjegavanja sihru i onima koji se njime bave. Ukoliko brak zapadne u krizu, rješenje problema treba potražiti u uputi Poslanika, sallallahu alejhi ve sellem, jer je u njoj svako dobro.

Od upozorenja koja su došla od Vjerovjesnika, sallallahu alejhi ve sellem, vezano za sihr i one koji se njime bave, je slijedeće:

1- Poslanik, sallallahu alejhi ve sellem, se odrekao sihirbaza i onoga ko traži sihr

Bilježi El-Bezzar, sa dobrim lancem prenosilaca, hadis od Umrana b. Husajna, od Poslanika, sallallahu alejhi ve sellem:

„*Nije od nas ko predskazuje i ko traži da mu se predskazuje, ko vrača i ko traži da mu se vrača, ko pravi sihr i ko traži da mu se pravi sihr, a onaj ko ode vračaru i povjeruje u ono što mu on kaže, porekao je ono što je objavljeno Muhammedu.*“

2- Sihr je od onih grijeha koji upropaštavaju (mevbikat)

Od Ebu-Hurejre, radijallahu anhu, se prenosi da je Allahov Poslanik, sallallahu alejhi ve sellem, rekao: „*Klonite se sedam grijeha koji upropaštavaju.*“ Rekoše: A koji su to, Allahov Poslaniče? Reče: „*Pripisivanje Allahu druga, sihr, ubistvo osobe koju je Allah zabranio na pravdi boga, jedenje kamate, jedenje imetka siročadi, bježanje sa bojnog polja i potvaranje čednih i plemenitih vjernica.*“

3- Sihr je jedan od najvećih Velikih grijeha na Sudnjem danu

Bilježi Ibn-Hibban u svome «Sahihu» hadis od Amra b. Hazma, radijallahu anhu, o dopisivanju Poslanika, sallallahu alejhi ve sellem, sa stanovnicima Jemena, u kojem stoji: „*...i od najvećih Velikih grijeha kod Allaha*

na Sudnjem danu je pripisivanje Allahu druga, ubistvo vjernika na pravdi boga, bježanje sa bojnog polja na Allahovom putu, neposlušnost prema roditeljima, potvaranje čednih vjernica, učenje sihra, jedenje kamate i jedenje imetka siročadi.“

4- Oni koji se bave sihrom neće ući u Džennet

Bilježi Ibn-Hibban u svome «Sahihu» od Ebu-Musaa, radijallahu anhu, da je rekao: Rekao je Allahov Poslanik, sallallahu alejhi ve sellem: „ U Džennet neće ući notorni alkoholičar, ni onaj ko vjeruje u sihr, niti onaj ko kida rodbinske veze.“

Upitan je naš uvaženi učenjak Usejmin, rahimehullah, o propisu spajanja među supružnicima putem sihra?

Odgovorio je: „To je zabranjeno, i ni u kom slučaju nije dozvoljeno. To se zove spajanje, a suprotno od njega je razdvajanje, što je takođe zabranjeno, i može biti nevjerstvo i mnogoboštvo – da Allah, dželle šanuhu, sačuva.“

Ovo je sve što sam sakupio i pojasnio, a pritrđeno je u praksi Vjerovjesnika, sallallahu alejhi ve sellem.

Molim Allaha Veličanstvenog, Gospodara Arša veličanstvenog, da od nas otkloni negativne stvari u ponašanju, djelima, žudnji i lijekovima. Molim Ga da nam vjerovanje učini dragim i da ga uljepša u našim srcima, a da nam nevjerstvo, grijehenje i neposlušnost učini mrskim, i da nas učini razboritim robovima Njegovim.

Mir i spas Allahov, neka je na našeg Vjerovjesnika, njegovu porodicu i sve ashabe. A Allah najbolje zna!

Sadržaj

Uvod.....	3
1. Poricanje muževog dobročinstva.....	7
2. Odbijanje muža u postelji.....	9
3. Otkrivanje bračnih tajni.....	11
4. Spolno općenje tokom mjesečnog ciklusa.....	13
5. Spolni odnos sa ženom u analni otvor.....	15
6. Pripisivanje mužu djeteta koje mu ne pripada.....	17
7. Nasilno oduzimanje ženinog vjenčanog dara.....	19
8. Zhtijevanje razvoda ili iskupa od strane žene, bez šerijatski opravdanog razloga.....	21
9. Nepravdnost prema ženama.....	23
10.Proklinjanje.....	25
11.Putovanje u nevjerničke zemlje radi turizma.....	27
12. Bavljenje sihrom.....	29